

**Imbert, Jean Henri - candidat /
Gaillard, Jean - président. - An
variolis malè erumpentibus venae
sectio ?**

1711.

***Paris : Apud Viduam Francisci
Muguet, Regis & Facultatis
Medicinae Typog.***

Cote : ms 2325 n°63



QUÆSTIO MEDICA,
 QUODLIBETARIIS DISPUTATIONIBUS
 MANE' DISCUTIENDA
 IN SCHOLIS MEDICORUM,

Die Jovis 12. Novembris 1711.

M. JOANNE GAILLARD,
 DOCTORE MEDICO,

PRÆSIDE.

An variolis malè erumpentibus venæ sectio?

I.

SOLIDORUM cum fluidis æquilibrium, perfecta sanitas. Hujus alteratio, morbus. Sanitatem fermentationis opus ne putaveris? Veterum nunc deridentur facultates: Quid ni, & nostram fermentationem, idem quondam manet cachinnus. Hinc præjudicatæ opiniones procul à medicinâ. Variolas cognoscere tibi animus est? Naturam consule, docilem non fallit sui scrutatorem, variolæ fuerint veteribus cognitæ, scrupulosus ne nimium allabores. Omnis ævi sunt affectus, certis regionibus alii familiares, alii insolentes. Variolarum species quæris? infinitas propè numerâ. ratione temporis, regulares & irregulares, loci, sporadicæ & epidemicæ, moris, benignæ & malignæ, pustularum, distinctæ & confluentes: Essentia morbi in omnibus apud te sit eadem. Symptomata in distinctis mitiora, in confluentibus graviora interim Judices. de accidentibus interrogas? lumborum dolor febriliter adjungitur, corpus inquietum, & æstuosum humore diffluit, dolent fauces & pectus, respiratio hæret in medio, tussis minax pulmonem convellit, stomachus nauseabundus aqueo biliosa egerit, corruscant oculi,

scintillat flammeo colore saturata cutis, mentis aberrationes & terriculamenta ægotantem urgent, naturam variolarum eruptionem meditari audacter pronuntia. maculæ primum læves & rubræ è rotundâ basi in acumen molliter acclives desinunt; flavæ prius, demum aridæ resolvuntur, & contabescunt, naturam victricem clames. secus secretionem natura parans, gemit sub pondere morbi, vivifici liquoris nimiam dissolutionem, aut coagulationem suspiceris. tunc quo te vertas consule, illudque medicamento genus eligas, quod satiscenti naturæ opituletur.

I I.

CHYLUS & sanguis nec acido, nec acri sapore graves, corpus humanum sanitate beant. Hinc dulce & amicum solidorum in fluida imperium. Quæ dum fœdere junguntur stabili, machinæ fabricam servant incolumem. sanguis alterutro sale saturatus, solidarum partium vim eludendo, secum morborum originem invehit. Undè causa variolarum proxima. remotam si quæris? Ad res non naturales attende; ab ipsis fluidorum perversa indoles. sic in variolis particulis fœtus hæterogeneis qui peccat aër, purus, salubrisque suâ recreat nos præsentia. ab illius mutatâ constitutione morbi epidemici. à variâ cum nostris corporibus proportione, morbi peculiare. quid ergo mireris? si variolis infantes frequentius, ætate maturos minus, senes ferè nusquam obnoxios videas. ultrâ mittas quærere. Icarus pennis non homini datis aëra petiit, in mare præceps labitur. à diverso igitur aëris cum nostris corporibus respectu, morborum varietatem tuto repetas. hinc in affectibus Medicus sæpè luditur. alios proficuâ medendi methodo curatos videt, alios eadem, funere mersos stupet. rerum non naturalium in corpus humanum tanta potestas! exemplum habes præ manibus grave. in variolis hoc. ce tempore grassantibus sanguis suis interdum facillè purgatur sordibus, ab imminutis accidentibus recreata: functiones lætam prænantiant victoriam, abscessus sua non agrè decurrunt tempora. Interdum nulla fermenti morbifici separatio, particulæ malignæ indolis, nunc segniter erumpentes, nunc variis ludentes figuris, lethalia secum important symptomata. in his auxiliares naturæ manus præbere cupis? humoris inquinati secretionem leniter promove.

I I I.

FUNCTIONUM corporis humani præcipua, secretio. hæc fluida quod falendo corpori ineptum est, secernunt? sic sanitas viget integra, sic morbus expellitur, secretionis amica, humorum fluiditas. hinc nimia *coagulatio*, aut dissolutio aliena prorsus. utramque noscis? noscis & principes morborum causas. in *coagulatione* acido sale densatur sanguis, lento incedit passu, sulphurum crassiorum implexu, tardigradus fertur. In dissolutione, principia sanguinis sui juris facta, turbas movent in liquoribus. inde diversæ variolarum eruptiones. Naturam interim in expellendis hujusce morbi causis intentam vide. suas evocat undiquè vires, augetur solidorum tritus; donec materies morbifica suos conatus exerit. Quis victor? nunc morbus; nunc natura. Sanguis hæterogeneis fœtus partibus extricatur, impressaque

labes abundè propellitur foras, victrix natura, & sponte erumpunt variolæ. (Interdum tamen non nisi favâ mercede morbus solvitur. dum corrupto oculo, articulo-ve distorto ægrum dimittit.) Nunc sanguis concatenatus in glandulis sub cute confitis insigniùs effervesceat, pustulas adumbrat non erumpentes, tensor aut laxior solidorum tonus fluidis non imperat, nulla apparent coctionis signa, augentur dira morbi symptomata, opprimitur onere vivificus liquor; Victor tunc morbus, & malè erumpunt variolæ. Quid hic agat Medicus, quo se vertat tanti Judex certaminis. Quæcumque sint variolarum malè erumpentium causæ, præsidium sit tutissimum venæ sectio.

I V.

VENÆ sectionem infamari in morbis non novum, maximè in variolis. hanc immeritam aggredi, cum insanâ plebe garrere est. nullus affectus cui semel pluries-ve non competat. rationem quaris? in morbo solida vel liquida laborant. his fluendi libertatem, illis oscillandi potentiam impertitur. indè ipsiùs necessitas. (omnia enim in humano corpore ad æquilibrii leges ita putes dirigi, ut fluidorum copia solidorum vi agitandæ respondeat.) Variolæ malè erumpunt. Quid possit illa, interrogas? hujus ope frangitur humorum impetus, distenta vultâ tonum vasa remittunt se paulatim, robustior fit arteriarum contractio, ac proindè facilior circuitus. hinc si quid in sanguine spissius dissolvitur, quilibet itionis obices superantur, minoribus in vasis qui languet humor, præterlabenti datur diluendus, promoveturque materiæ hæterogeneæ separatio. at? illa corporis imminuit vires, naturam avertit ab eruptione pustularum, ad populum hæc, plebis est hominem eo judicare valentior, quo ponderosum magis. Medici legibus adhærere mechanicis, rationem consulere, & experientiam. hoc tibi sit venæ sectionis fundamentum in variolis malè erumpentibus. febris urget assidua, & non facilè domabilis. Undè symptomata ægrotantem premunt gravissima. Confugeris ne ad præsidia Chymicorum? In vasculis quidem suis sic norunt sales salibus, liquores liquoribus committere, ut quem quærunt, nullo intererâ periculo, habeant exitum. in corpore humano non impunè peccatur, nec eadem quæ extrâ contingunt, securè expectaveris. celebretur Phlebotomia, cardiacam hanc, diureticam, sudores promoventem experieris. uno verbo medicamentorum præstabit illa facultates, non incommoda; sicque uniùs ope præsidii, omnem adimplebis paginam.

V.

PRÆSIDIA frequentius usurpata in variolis, cardiacæ hæc ægrotantium suffragio invaluere, illorum imminuere famam, piaculum. sit igitur suus, nec parcus honos cardiacis. Habent illa locum. lentescenti nimium naturæ quid enim stimulos vetat addere. Cedant interim venæ sectioni. Pustularum eruptionem tuto promovere cupis, & symptomatum imminuere sævitiem, fibræ tonus pristinus, & naturalis reddatur; spiritibus, sanguini, lymphæ, aliisque humoribus restituatur justa temperies, & motus æquabilitas. hæc conciliare, quid venæ sectione parabilius. imminuit

inquinati sanguinis copiam, vasis ad oscillandum facilitatem parat, majorem coerces liquidorum impetum, hærentes succos à suis deturbat sedibus, amandatque foras. unde tanta secum afferat commoda venæ sectio, sciscitaris? attendas ad æquilibrium. stat illud! viget functionum integritas. pervertitur! ingruit morborum cohors. hinc innumeræ venæ sectionis facultates. in anginâ, phrenitide, peripneumoniâ, quanto cum ægrotantium solatio in usum quotidie revocatur. ab illâ quid abhorres, in variolis malè erumpentibus; acidus humor sanguinem ex parte cogit. naturalem ipsius motum inturbat, spirituum animalium irradiationem cohibet; venæ sectionis ope, agunt solida in acidorum aculeos repetitis ictibus, infringuntur illa, fit liberior sanguinis circuitus, facilior & mechanica separatio. sanguis furit in vasis, salia sulphuraque debito jam non irretiuntur vinculo, ruunt quâ datâ viâ, variolæ malignæ indolis suas ubique exerunt vires; his tuto mederi cupis. Confugas ad phlebotomiam; hæc liquidorum commercia aperies; sanguini, secretionibus, transpirationi impeditæ pristina asseretur libertas. unde ad corporis pomœria facilius humor morbificus propelletur.

Ergo variolis malè erumpentibus venæ sectio.

Domini Doctores disputaturi.

M. Antonius Pepin, Scholæ Professor.

M. Stephanus Franciscus Geoffroy, Regiæ scientiarum Academia Parisiensis, Regiæque Societatis Londinensis Socius, Professor Regius.

M. Claudius Guarin.

M. Petrus Azavedo, rei Herbariæ Professor.

M. Franciscus Aignan.

M. Ludovicus Morin, Regiæ scientiarum Academia Socius.

M. Joannes Herment, Medicus Regis ordinarius.

M. Jacobus Fournéan.

M. Matthæus Thuillier.

Proponebat Parisiis JOANNES HENRICUS IMBERT,
Parisius, Baccalaureus Medicus. A. R. S. H. 1711.

Apud Viduam Francisci Muguet, Regis & Facultatis Medicinæ Typog.